

1 Oritxi Mahãdu-ò

1 Oritxi Hãwã Dohodỹyna Mahãdu-ò

1 ¹Paulo jiarỹ Deuxudeewimy deòdumy wãhãre, Jesuisi Kristu deòdỹyna-ki wahe. Jiarỹ waityhydỹydu seriòre Sòteni-wana adee warybereny adiwahinyde. ²Oritxi hãwã dohodỹyna mahãdu-ò heka watyryiti adiwahinyde, Jesuisi Kristu òbitidỹyna mahãdu-ò, Deuxu hõrõ mahãdu-ò, hãwyy, hãbu-wana, ibutumy Jesuisi Kristu ityhydỹydu mahãdu-ò. Tii iny Iòlòrenymy heka ratximyhỹre. ³Ruxetòena, ywina-wana adeeren kanakemyidi watxireri, Deuxu iny tyby-ribi, Jesuisi Kristu iny Iòlò-ribi.

⁴Deuxumy reàlãmy watxiwãhãre, Jesuisi Kristu adeereny ruxetòena diwahinydeki. ⁵Ibutumy dori iribi tòerymy ahãte arybena-di, erysydỹyna-di. ⁶Kristu dee rybena akireny roimyhỹre. ⁷Iribi awahidỹyna rauhenyòreri, kaiboho dori Kristu deòsidỹynamy teraòmahãte. ⁸Jesuisi arawiòhenanyhy rarekre bededỹynana konana-ò, tatxuu òbitimy ixiko-ò, rexilamadỹynkemy. ⁹Deuxu òbitihyyra. Tii aratobinyra Tariòre Jesuisi Kristu-wana rarekremy, iny Iòlòrenymy.

¹⁰Jiarỹ adeereny rexitòenyreri Jesuisi Kristunimy iny Iòlòrenynimy wiwese wimy wimy bityhynymy marybebenykemy. Wade awiòre wiribi hitxi hitxidỹy. Wii bitotyntyhymy boibekemy adireny watxiwãhãre, araykyreny-ki, aerysynareny-ki. ¹¹Kaiboho waseriòre mahãdu, wimy taujòmótenyteri. Lòe hetowoludu mahãdu kia wako relyyra. ¹²Inyò wadee rarybemyhỹre. Ijõ mahãdu heka Paulo rityhynymyhỹre ihõrõ mahãdu wahe, ijõ heka Apòlo rityhynymyhỹre ijõ tasỹ Pedro rityhynymyhỹre, ijõ tahe Kristu rityhynymyhỹre. ¹³Aòherewe, Kristu be iny rihitxihitxinymyhỹre. Paulo be itxeò nihikỹ tyre-ki rurure adeereny. Pauloni-di be rasebere. ¹⁴Inyò he ròratisebenyòre. Krispu, Kaiowanale tahe resebenyre. Tai tahe wabedesamy watxireri. ¹⁵Kiamy ta heka inyò rarybeke lau rejõnymahãre: —Jiarỹ Pauloni-di rexisebenyre. ¹⁶Tefana hetowoludu mahãdu adiratisebenyde. Inyò reratisebenykeki wanohõti reaõhyyre. ¹⁷Kristu dori aõsebedỹymy aõkõ diwateònyde Rybewihikỹmy

rybemy. Bede erydÿÿna nihikÿmy rybemy aõkõ diwateònyde, Jesuisi itxeò-ki lamana ariwòkemy aõkõ, kia inydeereny rurureki wahe.

¹⁸Kristu itxeò rubumy ijyy heka ityhydÿÿdukõdu dee itxÿtena rare. Biu-ò hedu mahãdu dee tahe, Deuxu ruru kia rare. ¹⁹Kiamy tahe iritidÿÿna roire: ierysydu mahãdu erysyna-di ariixãwidÿÿnyke. Bede erydu rayky-di adijõnykre. ²⁰Titxibo tahe bede erydu rare. Tyyritimy erydu heka titxibo rare. Titxibo tahe wiji dÿÿraxidu rare. Kabede ludu bede erysyna heka Deuxu-ò itxÿtedÿÿna rare. ²¹Bede bede ludu mahãdu rõhõtinyre bedeerytyhmy. Tai tahe Deuxu iximy riernanyõhyre. Kia tahe Deuxudeewire. Iny rybewihikÿmy rybe heka iny wixira-ò itxÿtere. Kia-di tahe Deuxu iny ritareri iny rityhnyreki. ²²Judeu mahãdu aõwiwi rÿikemy aõbo raremy ratxireri. Judeukõdu mahãdu bede erysydÿÿna-di rarekemy riijemyhÿre. ²³Kristu itxeò-ki lamanamy iny rarybemyhÿreny. Kia tahe judeu mahãdu riojinyre, judeukõdu mahãdu dee itxÿtena kia rare. ²⁴Tahe Deuxu rariròwysyna judeu tule judeukõ mahãdu-ò heka Kristu erydÿÿna tule ruruna rare ihedÿÿnarenymy. ²⁵Deuxu itxÿtedÿÿnamy rybe hãbu bedeery ratyre rare. Deuxu iruruõkeki, tii hãbu ruru ratyre iruru rare.

²⁶Waseriòre mahãdu arariròwysyna-di mohõtinybenybeke. Beteheemy iny erysyna mahãdu-ribi sòweõre, Deuxu rariròwysyna mahãdu. Dinodu mahãdu sòweõre, iny Iòlòtyhy mahãdu-ribi sòweõre. ²⁷⁻²⁸Deuxu heka aõna aõna itxÿtena ritare bedeeryhykÿ mahãdu riixÿrudÿÿnykremy. Aõna aõna ruruõ Deuxu ritare aõna aõna ruru-di riixÿrudÿÿnykremy aõna aõna derare, aõ aõkõ rare Deuxu ritare aõ-di aõ aõkõ-ò rijjanykre. ²⁹Tai dorihe inyõ rexityhnykòkemy Deuxuko-txi. ³⁰Kaiboho dori Jesuisi Kristu hõrõ toite. Tii heka inydee ibutumy rare: erysynamy òbitinamy, tamanamy, tarasanamy rare biu-ò hena wahe. Deuxu kia ibutumy diwahinyde inydeereny. ³¹Kia dori ritina rybe-ki roire: —Inyõ rexiwowydynykeki, Deuxu-ki rexiwowydynyke.

2 ¹Waseriòreboho aõ hãbu bede erynihikÿ wese aõkõ adeereny anade. Deuxu rybetyhydÿÿnanamy ararybekremy. Rybenihikÿmy heka rarybeõre. ²Tii sohojile reeryre akireny rarewãhãu, Kristu itxeò-ki lamanale wahe. ³Akireny rarewãhãu waruruõmy rarewãhã, ixÿru brebu tahe riwamytatadÿÿnyre. ⁴Wabedeerydÿÿna erytyhy rybesirahakÿ-di aõkõ rarybereri iny rityhnykemy. Urile tahe Deuxu Tyytyby ruru-di rarybewãhãre. ⁵Hãbu erytyhydÿÿna aõkõ bityhnykemy adi wãhãre Deuxu ruruna tahe atyhynarenymy heka idi toite.

⁶Ityhydÿÿdu umy-ò bede erydÿÿna-di rarybemahãre. Kabede aõmydÿÿnana bede ery aõkõ rare. ⁷Kia tahe Deuxu erydÿÿna tyhyre. Kia heka hãbu mahãdu lau riwòmyhÿre. Juhu inydeereny riywinyre. ⁸Kia bede erydÿÿna inyõ wiji Iòlòtyhy mahãdu rieryõre. Kia rierymyhÿkeki, Wanyrÿ wowydyna-ribi itxeò-ki ritamadÿÿnyõhyre inihe. ⁹Iwese Ritidÿÿna roireri wese rare: —Rue lobixiõhyymyhyre, nohõti heka roholaõhyymyhyre, inywo rieryõhyymyhyre, aõbo Deuxu riwinyre taluuna mahãdu dee, tamy riwahinykremy. ¹⁰Deuxu Tyytybytyhmy kia inyboho riteòwarixinyreny. Ityytyby ibutumy rieryre. Deuxu raykywo-ribi aõ ritÿnynymyhyre. ¹¹Inyle heka iny ixirayky rierykre,

kawese tule Deuxu tyytybydile aõna aõna rierykre. ¹²Bede aõmydÿÿnana aõkõ inydeereny wahisidÿÿdu rare. Deuxu Tyytyby tahe inydeereny wahisidÿÿdure. ¹³Kiadile Deuxu wahisidÿÿna iny reeryrenyre. Kia iny reerydÿÿnanyamahãrenyre hãbu bede erydÿÿna-di aõkõ, Deuxu Tyytyby rybe-di tahe reerydÿÿnanywahãre. Kia iny retÿnynmahãre iny Deuxu Tyytybytyhy-di mahãdu-ò. ¹⁴Iny Deuxu Tyytybytyhy-di rÿiõra mahãdu dee Deuxu Tyytybytyhy aõmydÿÿna dera. Tamy itxÿte rare. Rierykõre. Deuxu Tyytybytyhydile iny rierymyhÿre. ¹⁵Iny heka Deuxu Tyytybytyhydikeki ibutumy rierymyhÿre. Inyõ tahe tuu aõmy tuu irybeõna. ¹⁶Ryberiti-ki roire: —Mobo tahe rieryre Wanyrÿ rayky, mobo tamy aõ ritÿnynykre inyõ aõbo? Inyboho Kristu rayky ijõdire, iwesele raraykynymyhyre.

3 ¹Waseriõreboho adeereny rarybeõhyre hãbu Deuxu Tyytybytyhy-di rÿira wesemy. Hãbu òrarudu wesemy rÿirawesemy adeereny ararybeke. Uladu wesemy Kristutyhydÿÿ-ki rÿira wesemy adeereny rarybere. ²Huÿsy-di òedÿÿ araerynadÿÿnyrenyreu rÿsÿnatere wesemy aõkõ erydÿÿnasiramy aõkõ rybe. Kia rÿsÿna rÿsÿmy textiwinyõtenyte. Wiji tule textihumy aõkõ toitenyte. ³Òrarudu wesemy dori ahãtenyte. Ihãrumy, ijãmy atximyhÿtenyte. Tai tahe òrarudu mahãdu wesemy ahãte ityhydÿÿdukõdu mahãdu wesemy ahãtenyte. ⁴Inyõ rarybekeki: —Jiarÿ Paulo erydÿÿnay-ki rare. Ijõ rarybekeki: —Jiarÿ Apòlo erydÿÿnay-ki rare. Tiiboho ityhydÿÿdukõdu mahãdu wesemy ihÿrenyre. ⁵Aõbohe Apòlo, aõbohe Paulo. Deuxu deõdu heka inyboho roire. Inyribireny tetyhynmy teerymahãtenyte. Iwese Deuxu iny sohoji sohoji-ò aõmydÿÿna riwahinyre wese, tai tetyhynnytenyte. ⁶Ta jiarÿle rybemy rarybere iny aõty ribòrònymyhyre wese, Apòlo rybe ritÿnynyre iny alòbòrõna ribenymyhyre wese rituunyre. Deuxule tahe idimyhÿre iwese alòbòrõna riumydÿÿnymyhyre wese. ⁷Tai tahe tòbòrdÿÿdu aõ aõkõ rare; ituudÿÿdu tule aõ aõkõ rare. Deuxule aõwedu wedu heka rare. Tiile ityhydÿÿdu widÿÿdu nihikÿ rarekre. ⁸Tòbròdÿÿdu ituudÿÿdu-wana sohoji wesemy ihÿrenyre. Sohoji sohoji tauri wahisidÿÿ ritakremy, iwese sohoji sohoji raaõmysÿdÿÿmyhyre wese. Wiwana dori Deuxu dee iny raaõmysÿdÿÿmyhyre. ⁹Inyboho heka Deuxu wiòhedÿÿdu mahãdu roire. Kaiboho tahe Deuxu oworu wese toite. Iwese tahe Deuxu heto wese kaiboho toite.

¹⁰Heto widÿÿdu deyrewewese retelenyre. Ibutumy Deuxu ruxetõenamya kia rewinyre. Juhumana retidire idi tahe itira ityre reòdõnyra. Ywimy biwinybenykre. Awimy bitamadÿÿnykemy. ¹¹Jesuisi Kristu juhumana wese heka rare, inyõ tiile tarasadu wahe ijõ manaõ teròwmy ritidiõtyhy. ¹²Ibutumy juhumanatyre-ki relereri. Ijõ womati tÿrÿrÿhÿkÿ, ijõ prata-di ijõ manatÿny-di, ijõ òwòru-di, ijõ òteti-di, ijõ horeru-di. ¹³Kia txuu Kristu txu wahe riteòsinykre aõdibo sohoji sohoji raaõmysÿdÿÿmyhyre heòty dori riurihixinanykre. Aõhebo iny rotÿÿnymyhyreki. ¹⁴Juhumanatyre-ki iny aõmydÿÿna rÿikeki, tii uri iwahisidÿÿnana ritakre. ¹⁵Iny aõmydÿÿna rasõkeki tii ròònodÿÿkre. Ihãre tahe tarasana ritakre heòtyroobymy wahe.

¹⁶Kaiboho Deuxu heto wesemy toitemahã. Teeryõte aõbo. Deuxu Tyytybytyhy heka aworeny-ki rasÿnymyhyre. ¹⁷Inyõ Deuxu heto wesemy

rahukeki, Deuxu tii rihukre, Deuxuheto dori rare. Kia tahe kaiboho toite Deuxu heto lytytyhy rare, ihõrõtyhy wahe.

¹⁸Ixi itxenadỹõmy, inyõ bedeerymy xixi-di rõhõtinykeki, raitxỹteke tai tahe bedeery inatyhy-ki rareke. ¹⁹Kabede bede eryna tahe Deuxu dee itxỹtena rare. Kia Ritidỹõna-ki tahe roire: —Bede erynadu tyhy tabedeerydỹõna-ki Deuxu-ò rõõnodỹõre. ²⁰Ijõ Ritidỹõna-ki roire: —Wanyrỹ, bede erydu rayky rieryre. Kia raykywi aõ aõkõ rare, rybetyhy aõkõ. ²¹Iny aõmydỹõnana-di xiwowdydyỹõmy, ibutu dori ahõrõ rare. ²²Paulo, Apõlo, Pedro, bede, umy, rubu, aõmydỹõna wijina, aõmydỹõna bede kanakre, ibutumy ahõrõ rare. ²³Kaiboho Kristu hõrõ toite. Kristu Deuxu hõrõ rare.

4 ¹Inyboho Deuxu deõdu roire, ibutumy idi mohõtinybenyke tii inykireny ihỹre. Inyboho dori Deuxu aõmydỹõnana erykõdu tỹnydỹõdu roire. ²Deuxu tỹnydỹõdu õbitihyky rarekemy. ³Wadi rõhõtinykeki awĩmy aõbo ibinamy aõbo kia tahe wadee aõ aõkõ rare. Aõbo dohodỹõ tỹnydỹõdu mahãdu wadi rohõtinyke kia wadee aõkõhykyre. Jiarỹ tahe xixi-di dehummy rahõtinyõhyamahãre. ⁴Jiarỹ reeryõre inyõ aõbinamy wadee rexiwonyke warayky wadee õbiti rare. Tahe ihãrele õbitimy iko-ki rare. Wanyrỹ tahe wadi timy rõhõtinyke. ⁵Kia tahe wiji idi timy nohõtĩõmy. Jesuisi nonanako-ki. Tii tahe kanakreu, ibutumy wasĩmy aõ rỹira ritỹnynykre, ibutumy iny raykymy rỹira ritỹnynykre. Kia txule ibutumy iny tabedeõby ritakre Deuxu-ribi.

⁶Kia aõna aõna wawese riwawesenanyreri. Apõlo wese tule rewesenanyreri. Kaiboho dori bierybenykemy kia: ierysydỹõrenyõmy aõbo iritidỹõnawo-ki ihoõre. Kia wese keki, ijõ tỹnydỹõdu ijõ ratyre ryiõtyhy. ⁷Mobo iny wiribi iwitxiramy ihỹre. Aõbohe akire Deuxule aõwiwi adee riõre. Ibutumy iribi tetateki tahe aõherekibo axiwedere. ⁸Kaiboho ibutumy aõ ijõdire. Tatyhytenyte, iõlõ wesemy taditehemynyte iny arawiõhenanyrenyõre. Wadee awire kaiboho iõlõmy ahãtenyte. Tai jiarỹboho awana ariõlõnykre. ⁹Kiamyre õsana. Deuxu dee heka inyboho deõdỹõna mahãdu rurukrerke mahãdu roire ibutuko-txi, ýjuko-txi, hãbukõ-txi. ¹⁰Kristu õraru-ki itxỹtewesemy jiarỹboho roire. Kaiboho Kristu erydure riki. Jiarỹboho warurukõrenyre. Kaiboho orarudirenyre jiarỹboho inyõ waluurenõre. Kaiboho tahe ibutu luuna toite. ¹¹Ihãre tahe wiji ramamy, bemomomy, tykyõmy rekoamyhỹre. Tule sỹywisidỹõna rỹiõre. Tule jiarỹboho wahãwã õbiti ihokõre. ¹²Ihãre inyboho naaõmysdỹõmyhỹde iny debõ-di irukemy. Inyõ inydeereny aõbinamy rarybekeki, awilemy inyboho rirawyõnymyhỹre. Inyõ aõsirahakỹle inydee riwinykeki, aõmy rybeõmyke. ¹³Rybebinamy inyboho dee reakeki, ihãrele Deuxumy tamy rarybemyhỹre. Rỹnysityby wese inydireny tiiboho retehemyhỹre, iijese ijese wesemy.

¹⁴Kia rõritidỹõreri aixỹrudỹõrenymy aõkõ, tahe wiõhedỹõdumy retirỹreri binadỹõna lau, iwese inytybyõ tariõre rierynanyre wese. ¹⁵Tahe sõwemy Kristu-ki bede erydỹõdu rỹire. Sõwemy aõkõ bobohomy rỹirenyre. Kristumy heka jiarỹ sohojile borenymy rare. Rybewihikỹ erysyna-di dori borenymy rãire. ¹⁶Kia dori kaiboho wawesemy boibekemy adireny

watxireri. ¹⁷Tai Tximòtxi reteònyre adeereny. Tii wariòre luu wesemy ratxire. Tii òbiti rare Wanyrỹ-ò. Tai watxi òhòtirenny reake iwese Jesuisi Kristury wese rariamyhỹreki, tule iwese reerynanyre wese ibutu dohodỹỹna hetowo-ki. ¹⁸Inyò ixiwowydydmy ixidi ròhòtinymyhy iwese arura-ò araòreki. ¹⁹Wanyrỹdeewikeki arakre wylemy arorarenny-ò. Tai arierykre ixiwowydydmy nohòtidu irybe sohojile aòkò arierykre, aòhebo rotỹỹnyre tule arierykre. ²⁰Deuxu òlòna heka rybe sohojile aòkò rare, rurutyhy heka rare. ²¹Aòbo tahe awityhyre òhòte-di adehemyny aòbo, ada luuna-di ywina-di adehemyny aòbo?

5 ¹Dohodỹỹna mahàduy-ki òrarutyhy-di riki toite kia tahe rare: hàbuò heka tybyhãwyytyby-wana roire. Kia òraru tahe ityhydỹỹdukòdu mahàdu riòludunyòhyymyhyre. ²Kia hyyle ixi-di aò aòkò tòhòtinymyhyte. Aòherekibo bede teòtiinyòtenyete tahinyòmy idi textiòenyòhyytenyete. Hàbu kia riwinyre, ityhydỹỹdu mahàduy-ribi biòlòdỹỹnyke. ³Jiarỹ akyneny-ki watxiòrerihãre, tahe warybetytyby awanarenny ratxireri, iwese jiarỹ awana ratximyhyre wesele. Tahe wadohodỹỹna ariwahinykre kahàbumy ibinamy riwinyremy. Tahe ityhydỹỹdu ributunykeu, ⁴warybetytyby akireny rỹireu, Jesuisi Kristu ruru akireny rỹireu, kahàbu Satanasi-ò biwahinybenyke. ⁵Tai kahàbu umy Satanasi-ò biwahinybenyke itytytyby tahe rahenykre Wanyrỹ Jesuisi kia nonanatu-u. ⁶Arybe iximy wydy awi aòkò rare. Taholaòtenyete aòbo kia rybe-ò; iuri ibutere paò widỹỹna sòwemy rauridỹỹra uridỹỹna heka òraru wese heka rare. ⁷Idi behubenyke iuri hitxina-di, tahe paò iuriòmy rỹirekre wese boibekemy òbitimy, Kristu tule buddeni xiwedỹỹna wesemy inydeereny rurure, iny Pascoarenny worana bedehesi dorihe rarỹỹnomy rare. ⁸Tai tahe ixena roxina rikiwinyrennyke. Paò iuri-di ryiòmy rakatximyhyrenny. Kia uri paò òraruihetxina wese rare. Paò tỹmyra, òbitire, inatyhyre, tii rikiyrennyke. Kia tahe rare òbiti widỹỹna wahe.

⁹Adeereny watyryiti rewahinyre òrarudu mahàdu roo-ki risiòmy, òtadu mahàdu-wana boiòkemy. ¹⁰Ibutumy òrarudu mahàdu-ò aòkò adeereny rarybere. Iny ibina mahàdu, wasidu mahàdu, Deuxutyhy luukòdu mahàdu. Kia-wana noòrennykeki, bede-ribi ihyye bexihitxinyke. ¹¹Wiji watyryiti kia wese rewahinyre. Ityhydỹỹduy-txi ròtedu òrarudu rarehykeki, kia roo-ki risiòmy tule iny ibina mahàdu, Deuxutyhy luukòdu, ujòmomy rybedu, wasidu, axaxa momodu, kia mahàdu-wana tahe byreòmy. ¹²Ityhydỹỹdukòdu mahàdu ywisidỹỹdu aòkò jiarỹ rare. ¹³Deuxu dohodỹỹdukòdu mahàdu hitxidỹỹdu rarekre. Deuxu Ryberiti-ki roire: —Òrarudu ay-ribi biòlòdỹỹnyke.

6 ¹Iny ityhydỹỹduò widee raurenanykeki, aòbohe awire? Erysydu-ò rikidy aòbo ada ityhydỹỹdu mahàdu-ò rybeke aòbo? Uritere ityhydỹỹduòle marybekre. ²Ityhydỹỹdu mahàdu bede bede mahàdu ierysydỹỹkre. Kia teerytenyòta aòbo. Ityhydỹỹdu mahàdu bede bede mahàdu ierysydỹỹkeki, aòna aòna iyja tahe teeryòtenyete timy rasỹdỹỹnykemy. ³Tahe inyboho ýju aòmydỹỹnana rikieryrennyke. Kiakeki iratyre kabede aòmydỹỹnana

rakierenyhykye. ⁴Erysydÿÿnana ijõdikeki, aõherekibo erysydu ityhydÿÿdukõdu-ò radymyhÿre. Ityhydÿÿdule aõtxi awire. ⁵Kia heka adeereny ixÿruna rare. Hãbu erysydu ityhydÿÿdu mahãduy-ki ratxiõre aõbo ierysydÿÿ-ki. ⁶Erysydu ijõdihãre ta ityhydÿÿdu seriõre wii ridyke aõbo ityhydÿÿdukõdu erysydu-ò, kia awiõre. ⁷Ityhydÿÿdu wii ridykeki, kia tahe iaõ bede eryõmy rare. Inyõ adeereny aõmy rotÿÿnykeki, urile tahe aõhõkÿmy rotÿÿnykre. Kia heka Inynyrÿ-ò õbitire. ⁸Kaiboho ityhydÿÿdu hãre aõhõkÿmy wii tesÿnymahãtenyte. ⁹Orarudu mahãdu-ò, Deuxu lõlõna uri riwahiõtyhy. Kia teeryõtenyte, iny ywimynoduõ, Deuxutyhy luukõdu, wiriõrese-ò õtadu, hãbu hãwyy wese rexiwahinymyhÿre ijõ hãbu-ò. ¹⁰wasidu, ixidee imynomy nohõtidu, axaxamomodu, jei jeimy rybedu, inywitxira aõmydÿÿnana wydydu, kia-ò Deuxu lõlõna uri rawahiõtyhy. ¹¹Kaiboho heka juhu kia wese toite. Wiji tahe iny lõlõ Jesuisi Kristu, anasuhode, anaixãwidinyde anatade Deuxu Tyytybytyhy-di.

¹²Ibutumy ariwinyke ixidee wikeki ibutumy aõmydÿÿnana tahe iwidyÿ awiõre. Ibutumy arotÿÿnyke ixidee wikeki, aõ aõkõ tahe waumy-di rarekemy raremyhÿ. ¹³Rÿsÿnaheka weryri-ò ralõmyhÿ kia-ò heka ihÿmyhÿre. Kia heka Deuxu wiwanale rahukre ikonana-ò. Umy heka õraru-ò sohojile aõkõ rÿire. Deuxu umydikemy dorihe riwinyre. ¹⁴Deuxu Inynyrÿ riixixanyre rubu-ribi. Tule iny kidiixixanykre taruru-di. ¹⁵Iny umy heka Kristu rareasa rare. Kia aõbo teerytenyõte? Kabe Kristu rareasa aderana-wana rabutukre, aõkõrehe. ¹⁶Inyõ hãbu aderana-wana roikeki, sohoji umyhyyle wiwana roireke. Kia teerytenyõte aõbo? Kia Tyyriti Iritina-ki roimyhÿre, hãbu hãwyy-wana sohoji umyhyyle wiwana roireke. ¹⁷Moo Wanyrÿ-wana ributunykeki, sohoji Deuxu Tyytybyle rareke. ¹⁸Oraru-ribi teõrehe my atximyhÿbenyke Ijõ õraru inyõ riwinykeki umywo-ribi nodu aõkõ rare. Òta òta õraru tahe inyõ riwinykeki, kia ixiumy õludu õraru-di reake. ¹⁹Aumy Deuxu Tyytybytyhysÿ rare. Kia aõbo teeryõte? Deuxu rexiwahinyre awo-ki rasÿnyhyymy rarekemy. ²⁰Kaiboho aumy wedu aõkõ atxitenyteri. Jesuisi Kristu adee rurureki. Tii õwynihikÿ-di anadyde, Kia tahe aumyreny-ki Deuxu-ò bealãbenyke, õbitimy bexisÿnyke aumyreny-di.

7 ¹Atyriti dÿÿraxi rerawyõnyreri. Kia rare: hãbu hãwyy-ò aderexiõhyykeki, kia heka awire. ²Hãbu tahãwyydihyye rareke, tule hãwyy tahãbudihyye rareke òta òta õraru dori sõwereki. ³Hãbu tahãwyy-ò umy wahisidÿÿna tamy riwahinyke. Hãwyy tahãbu-ò umy wahisidÿÿna riwahinyke. ⁴Hãwyy taumywedu aõkõ rare, ihãbu iwedure. Tule hãbu taumywedu aõkõ rare. Ihãwyy iwedure. ⁵Wiõmysadÿÿõmy. Urile rexitõenykemy aõtxu-ò wii riõmysanykre. Urile ixideewimy wiwana ratxike. Idi wiwana roikre Satanasi riixiranyheny bededÿÿnana riijereki. ⁶Kia warybe bede ywina aõkõ rare. Urile wadohodÿÿna rare. Ade awikeki, tuu bityhynybenykemy. ⁷Ibutumy hãbu wawese rÿirakeki, awire. Iny sohoji sohoji tahe, Deuxu bede ywisidÿÿna tamy riwahinyra ijõ wiribi lahixi ihÿre. ⁸Ixiyh mahãdu-ò wytese mahãdu-ò wadohodÿÿna rewahinyre: wawese hyy rÿirakeki, awire. ⁹Ixiwedukoeki, tahe boikre, tii arasahy mabekelau. ¹⁰⁻¹¹Hãbu

hāwyymy heridu-ò warybe rewahinyra, tahe warybe aōkō rare, Wanyrỹ rybe. Kia rare: Hāwyy uritere tahābu ririōhyyke. Hāwyyō tahābu-ribi rexihitxinykeki, ijō-wana roiōke ada tahābuwanale ixyby roike. Tule hābu uritere tahāwyy risiōmy. ¹²Ijō-ò warybe rewahinyra Wanyrỹ rybemy aōkō: Ityhydỹydu seriōre ihāwyy ityhydỹydukōdukeki, uritere iatysyōmy hāwyy tii-wana rarekemy ratximyhyreki. ¹³Hāwyy ityhydỹydu ihābu ityhydỹydukōdukeki, tule uritere iatysyōmy tahāwyy-wana rarekemy ratximyhỹreki. ¹⁴Hāwyy dori ta hābu ityhydỹydukōdu riōbitinymyhỹre rityhydỹynymyhỹ tii-wana ratximyhỹreki. Hāwyy ityhydỹydukōdu iwesele ta hābu risỹnyre. Aōkōkeki ariōre ityhydỹydukōdumy raremyhỹ. Ka tahe rityhynyre. ¹⁵Ityhydỹydukōdu resekeki ixinamy rake. Kia wesekeki, ityhydỹydu ritaamy aōkō ihỹre. Kaiboho ywina-di boibekemy Deuxu ratximyhỹre. ¹⁶Hāwyy, teeryte ta hābu rityhynykre aōbo, ada aōkōre aōbo? Aōkō, teeryōte.

¹⁷Iwese Deuxu iny sohoji sohoji rihitxihitxinyre wese, boibemahāke. Iwese atximahātenyte wese Deuxu anatadenydeu kia wese boibeke. Kiamy heka reerynanyamahāre ibutumy dohodỹyna-ki. ¹⁸Inyō notyky resyna-di bityhynykeki, kaweselemy mabeke. Inyō ōtyky resyna-di aōkō bityhynykeki, juhuu tatemahā wese mabeke, notyky resydỹyōmy. ¹⁹Notykyresy aō aōkō rare, ityky resykō tule aō aōkō rare. Deuxu bede ywina ywidỹyna, kia heka aō wihikỹ rare. ²⁰⁻²¹Iwese Deuxu ibutumy iny ditade wese, juhu widỹynalemy mabeke. Deōdumy aōbo tetyhnyte, tahe tuhyymy mabeke. Awedudeewimy bexihukeki tahe, idi make araokorore-ribi bohonykeki, tahe make. ²²⁻²³Deōduō-ò Deuxu ritakemy rarybekeki, tahe rityhynykeki, tii raōkōrō-ribi rohonyra Deuxu rue-ò òkresyō mahādu rityhynyrenykeki, tiiboho deōdu roire. Deuxu aradyra ōwyhykỹ-di tai tahe hābu deōdumy aōkō boibeke. ²⁴Ityhydỹydu seriōre, iwese atximahāte wese adee tarasanamy Deuxu rarybereu, kia wesele boibeke.

²⁵Ijadōma-ò bede ywinamy Wanyrỹ Deuxu tarybe diwahinyōde. Ihārele wadodỹyna adee ariwahynykre kialemy. Deuxu dori tatōenamy riwaōbitinyre. ²⁶Aōhebo kowa rotỹnyre, awi aōkō rare. Kia tahe aratohonykre: Iwese iny ratximyhỹre wesehyy, boibeke. Tii tahe wadee awire. ²⁷Kai aōbo hāwyymy heridu tate. Tahe ixihitxidỹymy nohōtiōmy. Kai aōbo hāwyymy heridu aōkō tate. Tahe hāwyymy herimy nohōtiōmy. ²⁸Tahe hāwyy-wana boikeki. Tii òraruna aōkō rare. Tule ijadōma roikeki tule òraruna aōkō rare. Ibutu iny heridu iaōmydỹy-ki aōhōkỹmy rotỹnyrenyke. Ilau jiarỹ adeeremy rarybere inyō aōhōkỹmy rotỹnyheny. ²⁹Bedeỹynana he iōhōre. Tai tahe adee rarybere waseriōreboho, inyō heridu ixihyno wese ratxikemy. ³⁰Iny bedewomy ratxirerí, ixibedewodỹy-ribi tōhōti rosake. Iny deysamy ratxirerí, deysa-ribi nohōti rosake. Inyō aō riwymyhỹré, ihokō wese rotỹnyke.

³¹Kabede aōna aōna kai bierysynanykeki iwese ierysydỹyōmy bisỹnyke. Kia aōna aōna ibutumy ituekre. Bedeỹynanahe aōwesele rexihukre. ³²Ixiraōmy ahābenyke, kiamy tahe adee watxiwāhāre. Inyō heridu aōkō Deuxu aōmydỹyna riwinywymyhỹke, iwese Deuxudeewimy ratximyhỹkemy. ³³Iny heridu heka bede

aõmydÿÿna riywinymyhÿre, iwese tahãwyydeewimy ratximyhÿkemy. ³⁴Kiamy rihitxinyre. Hãwyy tule heridu aõkõ Deuxu aõmydÿÿna riywinymyhÿre taumy Deuxu Tyytybytyhy õbitidÿÿmy. Hãwyy heridu tahe bede aõmydÿÿna-di rõhõtinyrehÿre tahãbudeewimy riywinykemy. ³⁵Kia aratohodÿÿnyra adeerenywikremy. Kaiboho arataaõtyhy. Urile anawidhenanymahãde Deuxu iõhõmyhÿreki. Iõkõramy ibutumy arahenyrenykemy watxiwãhãre.

³⁶Ijadõma tibiedÿÿdu tatibiena-õ õbitimy aõkõ risÿnyny rexinohtinyrehÿre. Ijadõma tahãbumy herina bede-õ rehemynyre. Tahe tatibiedÿÿna-di inyõ-wana roikemy idi ihÿre, ixinamy roiike. Kia õraruna aõkõ rare. ³⁷Weryrybõ heriõkemy raruronykeki, tii tahe awire. Tii dori irurudire iheridÿÿnyke heny. Tii ixiumy wedu rare. ³⁸Tahe riheridÿÿnykeki, tii awire. Tule riheridÿÿnyõkeki, iratyretyhy awire.

³⁹Hãwyy hãbu-wana rÿihyyke hãbu irumy. Rurukey tahe hãwyy aõtxile roiike. Urile Wanyrÿ Deuxudeewimy. ⁴⁰Tahe wytesetyhymy ratxihiyykeki, teysamy rÿikre. Tuheka jiarÿ rahõtinyreri. Deuxu Tyytybytyhy wawo-ki ratxirerimy idi rahõtinyreri.

8 ¹Katahe adeereny ararybekre: Suritxoo-õ rÿsÿna xiwedÿÿnamy. Inyboho ibutumy bedeery roire. Bede ery iny aõnityhymy rixinohõtinyre. Luuna tahe inywiõhedÿÿdure. ²Inyõ aõerysydumy rexinohtinykeki tii aõwihikÿ rieryõre. ³Inyõ tahe Deuxu luukeki, Deuxu tii rierymyhÿre. ⁴Kaa rÿsÿna suritxoo-õ xiwemy rawahimyhÿre. Kia tahe aritÿnynykre. Inyboho rieryrenyrehÿre suritxoo aõ aõkõ rare. Sohojihyy heka Deuxu rare. ⁵Iny deuxu aõ õta õtalemy rininimyhÿre biu-ki, bede-ki. Iwese deuxu sõwemy ihÿre wese wedu sõwe rare. ⁶Inydeereny Deuxu sohojile rare. Inytybyreny. Tii ibutu aõna aõna riwinyre. Tamy inyboho roire. Tule inydeereny Wanyrÿ sohojile rare, Jesuisi Kristu. Tii ibutu widÿÿdure. Tii ratximyhÿre xiery inyboho ratximyhÿrenyrehÿre. Tamy inyboho roire.

⁷Tahe ibutumy kia iny rieryõre. Iny sõwemy suritxoo iny reõwarimy rÿÿra. Tii riki ixiwenadumy riroxikeki, tai õraruna tuu relemyhÿre. ⁸Rÿsÿna aõkõ riwatyhenyrenyra Deuxu-õ. Tai roxiheny rÿÿre. Rikirÿsÿrenyõkeki, rikiõnonyrenyõtyhy. Rikirÿsÿrenykeki, aõ rikitarenyõtyhy. ⁹⁻¹⁰Bexiebenyke. Urile ityhydÿÿdu aokõdu ixihe-ki iatysyõmy, aurihixinahe-ki. Suritxoo hetowo-ki inyõ umy robikeki teroxiterimy, tii tule ijõ rÿsÿmy rexiwonyre, xiwe rÿsÿmy. ¹¹Tai tahe aõraru-ki aseriõre atyhyna-ki õraruna-txi resekre. Tamy Kristu tarasamy rurure. ¹²Kiamy ityhydÿÿdu seriõre-õ taðrarunyteki, tule Kristu-õ textiõrarunyte. ¹³Tai rÿsÿna õraru-ki ityhydÿÿ-ki waseriõre õraruna-txi resekeki, jiarÿ kia rÿsÿna ariroxiõtyhy, waseriõre õraru-ki.

9 ¹Jiarÿ adeereny rexihymy watxiwãhãre. Jesuisi teodÿÿnamy jiarÿ watxiwãhãre. Jesuisimy, Inynyrÿrenymy rabiõremy tahõtinyamahãtenyete aõkõ, Jesuisimy rabire. Waðraru-ki kaiboho ityhydÿÿdumy toite. Deuxu dee waõmysÿdÿÿ õraru-ki ayreny-ki. ²Inywitxiraõ-õ õsana Deuxu deodÿÿnakõmy watxiwãhãre. Adeereny tahe inatyhymy Deuxu teodÿÿnamy wãhãre kaiboho dori wateodÿÿna urihixinamy ahãtenyete Deuxu dee.

³Kia tahe warawyòdđyña rare iny wixiraò-ò: ⁴⁻⁵Jiarỹ ariroxikeki, ariòkeki, tai aòkòhe awilere. Ityhydđydu hāwyyò-wana, wawana aridykekò aòbo awileke. Kawese ibutumy Deuxu teòdđyña mahādu rotỹmyhỹre, tule Jesuisi seriòre, tule Pedro. ⁶Jiarỹ, Banabewanahyyle raaòmysđdđyñwāhāre iny aòreny tarasanamy. Kia rikirirenykeki, awikeki, aòbo. ⁷Inyò aòbina-ò rakeki, ta aò aòbo riòwynyke? Aòkòre. Inyò oworomy uva bederaty ribrònyke-wana, bederatyò aòbo ritòleke. Inatyhymy inyò teòte asi-ò riyrubunymyhykeki, ihowỹsomy aòbo riòmhyhỹke? Kohe, riòmhyhỹke. ⁸Kabexe hābu wese aòbo jiarỹ rarybereri? Tule tahe bede ywina tyyriti aòbo riritinymy rỹimhyhỹre. ⁹Moisesi bede ywina ritidđyña-ki rỹimhyhỹre: —Broreniry itaaòmhyhỹ maixòmo tyre rariamy risymhyhỹreu. Deuxu aòbo broreni riwotòdenymyhyhỹre. Aòkòre. ¹⁰Tahe waòrarureny-ki aòbo kia rarybere. Kohe. Inyò ròbròmhyhỹreu, iyremy ritakemy ròhòtinymyhyhỹre. Tule inyò riòròmhyhỹreu, ijòò ixidee ritakemy ròhòtinymyhyhỹre. ¹¹Deuxu Tyytybytyhy aòmđdđyñanamy adeereny anaerynanykeki, idi aòna aòna aribireny aritaleke, aòbo? Kia aònityhyre aòbo? ¹²Iny wixira aò aribi ritake-wana, jiarỹboho iratyre iu aròtarenykemy arotỹnyrenyke. Tahe tiu ròtaòhyre. Deuxu Rybewihikỹ tỹnydđyña ariokòròòtyhy. Tai ibutumy aò wixira wixira riòludunywāhāre. ¹³Dohodđyña heto deòdu irysyna ritamyhỹre dohodđyña heto-ribi. Xiwe dinodu aò rỹsỹna ritamyhỹre xiwena-ribi. ¹⁴Kia wese Deuxu rarybere; inyò Rybewihikỹ ritỹnynykeki, ibutumy aòmỹ reamyhỹre ritamyhỹre, Rybewihikỹ aòmysđdđyñbro-ribi. ¹⁵Tahe jiarỹ aò aribi retaòhyre tule kia reritinyreri aò aritakemy aòkò aribireny. Warybe inyò riònonykemy aòkò watxiwāhāre iko-ki tahe arurukre. ¹⁶Jiarỹ Rybewihikỹ retỹnynmahāre, rexierymahāre dori aritỹnydđyñke. Kia heka aòhòkỹ aòkò waloosònadikemy rare. Rybe aritỹnynyòkeki, heka aòbinatyhyò wadee kanake inyhe. ¹⁷Ixidee wimy Rybe aritỹnynmyhỹkeki, tai ki aritakre. Ixideewimy aòkò aritỹnynyke-wana, ihārele tahe itỹnydđyñmy iwahisidđyña wadee roire. ¹⁸Kiake-wana, timybo wawahidđyña ihỹre. Kia heka rare. Rybewihikỹ tỹnydđyñ-ò arexiòwynyòtyhy. Aòbo inatyhymy wahòròre, retaòhywāhāre.

¹⁹Jiarỹ inyeòdumy aòkò rarehywāhā. Tahe iximy rexideòdunyre sòwemy iny òraru-ribi aritakemy. ²⁰Judeu mahādu-ò judeu wesemy jiarỹ rexisỹnyre, judeu mahāduò dori òraru-ribi aritakemy idi watxireri. Moisesi bede ywina yrubudđydu mahādu dee ixiwesemy rexisỹnyre iòraru-ribi dori aritakemy. Urile jiarỹ kia bede ywiny rubudđyña aòkò rare. ²¹Bede ywina aòkò mahādu dee ixiwesemy rexisỹnyre. Urile Deuxu bede ywina dire jiarỹ Kristu bede ywina yrubudđydu jiarỹ watxiwāhāre. Kia iòraru-ribi aritakemy jiarỹ rexisỹnyre. ²²Irurukòdu mahādu-ò waruru aòkò wesemy rexisỹnyre, irurukòdu mahāduò ritakemy. Ibutu iny deewesemy rexisỹnymy rarewāhā, aòtxile tiibochoò aritakemy iòraruna-ribi. ²³Ibutumy rewinyre, Rybewihikỹ dee iwihòhedđyñdukemy ixi-di wāhāre.

²⁴Ijarana ròhònykeu ijaramy ijaranadu sohojile ròhònyra. Tiile wahidđyña ritake. Kaibocho maijarenybenyke tii bitakemy. ²⁵Ibutumy ijaradu ixidi rorenymyhyhỹre aòikòkòmy rexierynanymyhỹre. Kia riwinymyhỹ wahidđyña

ritakemy. Kia wahidỹna retybykre. Inydee wahidỹna tahe retybyõtthy. ²⁶Jiarỹ kawesemy rajjaranyre aõ aritakemy. Axiõ ijesumy resuwãhare yhyle rehetenyneri wese aõkõ. ²⁷Waumy-di ròrenyhyywãhare. Wadeõdu wesemy waumy resỹnyre. Tai dori resỹnyre. Jiarỹ inyõ-ò Rybewiwihikỹ aritỹnynyekeki, ywimy dehudu wesemy aõkõ arereke, adehuky-ribi riwata lau.

10 ¹Boholabenyke weseriõre ityhydỹdu mahãdu. Inytybyreny kia biuwetyky nonoe rawo-di roimyhỹ. Tule ahobesõhõkỹ rawo-di reurõreny. ²Moisesi, iwedu, ibutumy aho-di nonoe-di rexisebeny. Tai iwedu inatyhymy rityhynyreny. ³Deuxu Tytytyby rỹsỹna sohojile wiwese wesele ibutumy rirỹsỹre. ⁴⁻⁶Deuxu Tytytybythy mona sohojile ihỹre. Bee manay-ribi nade. Mana tahe Kristuweselemy ihỹmyhỹre. Inynyryĩ kiamy roiremyhỹu. Deuxudeewimy aõkõ riwinymyhỹre. Tai rurure bedero-ki. Kia tahe inydeereny bedeery urihixina ersydyỹnamy ratxireri, inyboho-dori aõbina widỹna aõkõ rokohotinyrenykemy, iwese tiiboho riwinyre wese aõkõ. ⁷Inyboho suritxoo tyhydỹdukyõ rokoireke iwese ijõ mahãdu tuu rerinanymyhỹre wese kõkremy. Ritina-ki roimyhỹre: —Tiiboho ronymyhỹre riroxikemy, riõkemy. Tahe ritamanyreny risinykremy. ⁸Tule òta òtamy rokatỹnyrenyõke iwese tii riwinyre wese —tai 23.000 iny rurure sohojitxu-u. ⁹Deuxu urihixirenyõmyke, iwese tii riwinyre wese. Tai rururennyre hemylala jurutana-ki. ¹⁰Iburaõmyke iwese tii ribuarennyre wese. Tai rubudỹdu rirubunnyre, Rubu Yju wahe. ¹¹Kia tahe bede ery urihixidỹna ersyna inydeereny ratxireri. Riritinymyhỹre iny bede erynarenymy. Bededỹnana konana-ò iõhõmy inyboho roire. ¹²Tahe inyõ õbitimy rỹimy rõhõtinykeki, tii rexijemy ratxike reseke lau. ¹³Ixirana isirare inydee rehemynyõtthy rikiõludunyõtthy. Deuxu awi rare. Riatyõtthy iõlududỹna-txi. Tii inydeereny ixirana-ribi ixitarasana riwahinyre. Iny rururenny wesele ixirana rare. Tai rikiõludunyrenyke.

¹⁴Waluuna mahãdu, kaiboho suritxoo luuna-ribi bexiebeny. ¹⁵Adeereny rarybere, kaboho dori abederyreny kai bedeerywesetyhymy toiteki. Mohõtinybenyke aõmybo rarybereridi. ¹⁶Deysanamona hyna aõbo ityhydỹdu mahãdu wowydyna rare Kristu hãlubu wesemy tuu riõreki? Iny paõ riyrenyreny, Kristu umy wesemy aõbo rare? Inydee aõbo wowydyna rare? ¹⁷Inyboho sõwe roire. Urile tahe paõ sohojihy rare. Sohoji butunahymy rare, paõ sohojiribile yre yre rarỹsỹre, inyboho sohojilemy roire. ¹⁸@judeu ijoi-ò betehebenyke. Kia xiwe rirỹsỹrenykeki, xiweribile ritamymyhỹre. Kia aõbo õbitire. ¹⁹Timybo jiarỹ rarybereri? Rỹsỹna aõbo xiwenamy diwahinydeki, kia aõbo aõ rare ada ritxoo aõ aõbo rare. ²⁰Kiamy aõbohe jiarỹ rarybereri? Aõkõre, tuu aõkõ rarybereri. Urile, kia raxiwemyhỹre, diabo tytyby-ò rare. Deuxu-ò aõkõ raxiwemyhỹre. Kaiboho diabo tytybyõ-ò tamy bexijemy. Tii-wana uritere nõmy. ²¹Wanyryĩ monamy biõkeki, tai diabo monamy tule biõõke. Wanyryĩ roxi-ki biroxikreki, tule tai diabo rỹsỹna rỹsỹõmyke. ²²Deuxu aõbo iny kidihãrudenykre. Inyboho aõbohe ityhyrennyre iratyre?

²³Aõwaxiny tuu botỹnyke.@ aõmydỹnana awire. Ihãre tahe awiõre. Aõmydỹnana ixidee wimy botỹnyke. Urile aõmydỹnana riwõhenanayõhyre. ²⁴Uritere aaõmydỹnana sohojidile nohõtĩomy; tule inywixira aõmydỹna-txi õhõti beake tai aõwiwihikỹmy tamy biwinykre. ²⁵Birõmyhỹke ibutumy aõ rỹimyhỹre meriadu-ki, nohõtĩomy aõbo raremyhỹmy. ²⁶Ibutu bede aõmydỹna Wanyrỹ wahidỹna rare inydeereny. ²⁷Ityhydỹdukõdu mahãdu aratobinymy, kai makeki, biroxike ibutumy aõbo adee kidekre. Dỹraxiõmy araykywydyna òraru-ki. ²⁸Tahe adee rarybekeki; kia ritxoo xiwe rare. Irỹsõomy, kia hãbu raykywydyna òraru-ki tamy ibinare wahe. ²⁹Araykywydyna òraru-ki aõkõ jiarỹ rarybere, tahe iwixira òrariki. Ijõ hãbu wixira rayky-di aõkõ aritõhõtinyinmyhỹke. Kia õsana inyõ rarybekre. ³⁰Dealãnadile jiarỹ ariroxiwãhãkeki, timybo inyõ ibinamy wamy rarybeke. Deuxu-ò dori rexideylydỹnyra. ³¹⁻³²Tai tahe, biroxibenyeke-wana, biõbenyekeki, aõmy botỹnykeki, ibutumy Deuxu wowydyna-ò botỹnyke. Inyõ atyhyna-di iatysyõmy, judeu mahãdu-ò, judeukõdu mahãdu-ò, tule Deuxu tyhydỹydu-ò. ³³Ibutu dee rarurunywãhare tamywikemy. Waaõmydỹnana sohojile aõkõ rahõtinyinwãhare ibutu iny aõmydỹna dee rahõtinyinmahãre tarasadỹmy.

11 ¹Iwese jiarỹ Kristu wesemy watximyhỹre wese kaiboho wawesele boibekre.

²Ararybekre: —Kaiboho awirenyremy kaiboho dori iwese bede eryna araerynanyre wese ibutumy teyrubunymahãtenyete. ³Tahe ijõmy araerynanykre. Kristu iratiwi ibutu hãbu ratyre rare. Hãbu tahe hãwyyrati ratyre rare. Tule Deuxu tahe Kristu ratiwi ratyre rare. ⁴Hãbu rexitõenyreu, ritỹnynykeu tarahety-di, Kristu rityhynyõre. ⁵Hãwyyõ tahe rexitõenykeu, ritỹnynykeki tarahety-di aõkõ, tii tahãbu rityhynyõre. Tii dori tarade rasymyhỹre wese ratximyhỹre. ⁶Hãwyyõ tarade rihetynyõkeki, tii tarade riorokre. Hãwyy tarasy lau raixỹrukeki, tahe tara rihetynykre. ⁷⁻⁹Hãbu tara rihetynyõmyhỹkre dohodỹna heto-ki. Bera-ò tyytyby wesemy Deuxu dee hãbu rare. Deuxu dee hãbu rare. Hãwyy tahe hãbu dee-ki rare. Hãbu heka hãwyy-ribi aõkõ dori iwidỹ rare. Hãwyy tahe hãbu umy-ribi iwidỹ rare. Hãbu hãwyy dee aõkõ relere. Hãwyy tahe hãbu dee relere. ¹⁰Tai tahe hãwyy tara riwõmyhỹke. Iu tahe hãbu rityhynymyhỹre jju òraru-ki. ¹¹Deuxu ityhdyỹduy-ki wiwesele wiweselemy ratximyhỹre. Hãbu hãwyy-di ratxikemy; hãwyy hãbu-di ratxikemy. ¹²Iwese hãwyy hãbu-ribi relereu wese, hãbu hãwyy-ribi reamy raumynymyhỹre. Deuxu ibutumy riwinyre. ¹³Kaiboho mohotinybenyeke: Hãwyy rexitõenyreu, tarade rihetynyke, aõbo ada aõkõre aõbo? ¹⁴Hãbu iraderehemy rỹira, tarati rityhynyõmyhỹre tuu rỹira. Kiamy bede riwaerynanyreny. ¹⁵Hãwyy tahe irade rehely rỹira ixiruxeradỹmy rỹira, hety wese tamy iõ rarekremy wahe. ¹⁶Inyõ iwixiramy rexinohõtinykeki, tamy ararybekre, kia wese: Inyreny-ki kia bede ywina rare ibutumy dohodỹna heto-ki.

¹⁷Aõwesebo botỹnykremy adee ararybekre. Wade awiõre iwese ahãtenyete wese kaiboho tebutunyenyeu, kia arawõhenanayõhyre urile

tahe arabinanytyhyrenyra. ¹⁸Juhuu ararybekre timybo raholaremy: kaiboho texihitxinytenyete dohodÿÿnaheto-ki, kia tahe retyhynyriòremy watzireri. ¹⁹Wiribi bexihitxinybenykeki, tai iny òbiti rÿira bierybenykemy. ²⁰Bibutunymyhÿbenykeu, Inynyrÿ roxina aòkò terÿÿmahâtenyete. ²¹Ijò detiteremy taroxina riwymyhÿre inywitzirako-ki. Ijò aò rimyòmyhÿreki rama risamyhÿre. Ijò tahe sòwetyhymy riòmy raitxÿtemyhÿre. ²²Kai aòbo ahetoòre, tai biroximyhÿkemy, biòmahâkemy? Kia wese-ki Deuxu dohodÿÿna heto aòbo tetyhynyòhyymahâte. Iaòkò rÿira mahâdu tule teixÿrudÿÿnymyhÿtenyete. Aòmybo ararybekre. Arawowydydÿÿnyrenykremy aòbo? Aòkòre. Tai arawowydydÿÿnyrenyòtyhy. ²³Kia Inynyrÿ-ribi retare, tule aerynamy adeereny rewahinyre. Kia wahisidÿÿnadyna txuu, Jesuisi Inynyrÿ orotxu rimyre. ²⁴Rexitòdenyredi, riòròre, idi tahe rarybera:

—Kia heka waumy rare. Adeereny wahidÿÿmy watzireri. Kia biwinymyhÿkreu, watxi òhòtirenny reakemy.

²⁵Tule riymyhÿre rahudi, tahe bemona hyna rimyra, idi tahe rarybera:

—Kia heka wadeewimy Deuxu, iny-wana ratximyhÿre. Wahâlubu òraru-ki kia riwinyre. Kia biòmahâbenykreu, aòu watxi òhòtirenny reakemy.

²⁶Tiubo paò biymahâbenykreu, bemona hyna-ribi biòmahâbenykreu, warubu rybe tetÿÿnytenyeteri idi adòðsekreu. ²⁷Tai inyò òhòtiòmy riykeki-wana, riòkeki-wana, tii Jesuisi umymy hâlubumy òraru-ki ratzireri. ²⁸Sohoji sohoji taaòmydÿÿnana-di rohòtinkyre, idi tahe riymyhÿre, riòmyhÿkre. ²⁹Inyò Jesuisi umy-di rohòtinyòkeki, ixidee aòbinahakÿ kidiwynyke. ³⁰Kia òraru-ki sòwemy binamy òhyyle toite, tule iny sòwemy rurumy rÿira. ³¹Iny xixi-di rohòtinkykeki, aòbinahakÿ rexierykemy, tahe iny rexiòbitinyke. Deuxu tai aòhòkÿmy rotÿÿnyòtyhy. ³²Inynyrÿreny inyboho riòbitinymyhÿre. Kiamy heka bede mahâdu-wana aòkòkeki, aòhòkÿmy rotÿÿnyrenykre. ³³Kiamy, waseriòreboho, roximy bibutunykrey, ijò wii biraòbenykre. ³⁴Inyò rama risamy rÿikeki, taheto-ki riroxike tai rihuòmy rÿimyhÿkre Deuxu ywisidÿÿna-ki. Adee arehemynykrey, ijò kia aòna aònamy aròerynanyrenykre.

12 ¹Deuxu Tyytybytyhy bede eryna wixira wixiramy adeereny ararybekre, araerynanyrenykem. ²Ityhydÿÿdukòdumy toitemahâu, aòò aradyrenyre suritxoo rybeòhòkÿ-ò. ³Tai arabedeerynryeri: Inyò Deuxu Tyytybymy rarybemyhÿkeki, tii rarybeòtyhy: Jesuisi ibina rare. Tule inyò uri rarybeòtyhy: Jesuisi Wanyrÿ rare. Tii Deuxu Tyytybytyhydile tuu rarybekre.

⁴Deuxu Tyytyby bede eryna wixira wixira sòwemy rÿire. Deuxu sohojile tahe iwahidÿÿdu rare. ⁵Aòmysÿdÿÿwi-ribi lahixi rare, tahe Inynyrÿ sohojile rare tamy rakaaòmysÿdÿÿnyke. ⁶Aòmydÿÿna wiribi lahixi rare, tahe Deuxu sohojile ibutudÿÿdu rare. Tii iny-ò aòmysÿdÿÿna widÿÿna riwahinyre. ⁷Sohoji sohoji tabedeeryna wixira wixira Deuxu Tyytybytyhy-ribi ritamyhÿre ibutu iny wiòhedÿÿmy. ⁸⁻⁹Inyò-ò bede eryhÿkÿ wahidÿÿmy ratzireri, Deuxu Tyytybytyhy iwahidÿÿdure. Ijò-ò tahe rybe bedeerydÿÿ wahidÿÿmy ratzireri, iwahidÿÿdu tiile rare. Ijò-ò tahe ityhydÿÿtyhy-ki rarekemy. Deuxu Tyytybytyhy iwahidÿÿdure.

Ijō-ò tahe, òhotibedumy rarekemy. Deuxu Tyytybytyhy risỹnyre rare. ¹⁰Ijō-ò tahe, bedeòby widỹȳdumy rarekemy, ijō-ò rybe-di tỹnydỹȳdumy, ijō Tyytyby erydumy, ijō rybewitxiramy rarybekemy, ijō rybe wiuròdỹȳdumy. ¹¹Deuxu Tyytybytyhy sohojile tahe iwahidỹȳdu rare. Tii sohoji sohoji-ò riwahinymyhỹre ixideewimy.

¹²Iny umy sohojihy rare. Urile iaòmydỹȳnana sòwere. Kia wese ityhydỹȳdu rỹira ityhydỹȳdu mahāduy-ki, Kristu-ki iny sohojihy. ¹³Sohoji sohoji mahādu-ribi rabutura, ijō judeu mahādu-ribi, ijō judeukòdu mahādu-ribi, ijō deòdu mahādu-ribi, ijō deòdukòdu mahādu-ribi. Wiji tahe Deuxu Tyytybytyhy-di sohoji hõrõmy iny rỹire. Idi tahe inyboho tỹximy rỹire. ¹⁴Umy dori sohoji aòmydỹȳnana-di aòkò rare, sòwere tahe. ¹⁵Inywa rarybekeki kia rarybekre òsana: jiarỹ umy aòmydỹȳnana aòkò watxireri, debò aòkò dori rare. Kia rarybekeki, ihāre ta umy aòmydỹȳnana aòemy ratxireri. ¹⁶Nohõti rarybekeki: rue aòkò jiarỹ rare, tai dori umy aòmydỹȳna aòkò rare, Kia rarybekeki, ihāre ta umy aòmydỹȳnana ratxireri. ¹⁷Ibutumy umy ruelemy ratxikeki, timybo rokoholarenkyre. Ibutumy nohõtiley ratxikeki, timybo rue rareke timybo robirenykre. ¹⁸Deuxu ibutumy aò ritidire, titxibo ixideewimy rõhõtinyre. ¹⁹Ibutumy aòmydỹȳnana wiweselehekỹkeki, timybo raaòmysỹdỹȳnyke? ²⁰Inatyhymy aòmydỹȳnana sòwere. Umy tahe sohojilere. ²¹Rue debò dee rarybeòtyhy: Kai aò aòkò tate. Tule ratiheka waò rybeòmy: Kaikòkeki wadee awike. ²²Kia kỹnyhe. Aò aòmydỹȳnana inydeereny iruruòmy aòmy aòkò rỹire wese, tii aòwityhy rỹire. ²³Tule aòbo inydee aòmy aòkò rỹira tamyhe woreke rỹimyhỹre iruxeramy aòkò rare, iny woreke rỹimyhỹre. ²⁴Aòbo inyumy-ki iruxeramy rare, kia uridỹȳòmy. Deuxu tahe umy aòmydỹȳnana ibutumy ributumy. Tii aò ibaturatyre rityhinyre. ²⁵Kiawese alòreòmy umy-ki ibutumy umy aòmydỹȳnana wiwana raaòmysỹdỹȳnymyhỹre wii riwiòhenanymyhỹre. ²⁶Sohoji aòmydỹȳnana txubererekeki, iuhe rubererenyke. Ijō teysakeki inyò riwowydinykeki iuhe reysake. ²⁷Boholabenyke, kaiboho Kristu umy mahāduò toite. Ityhydỹȳdu sohoji sohoji heka umy aòmydỹȳnanaò wese rare. ²⁸Deuxu ityhydỹȳdu mahāduykile iny rihitxinyre. Juhuu Jesuisi teòdỹȳdu mahādu, ihewo-ribi Deuxu rybe tỹnydỹȳdu mahādu, idi ierydỹȳdu, aòwiwihikỹ widỹȳdu, òhotibedu mahādu, wiòhedỹȳdu, dinoduwesedỹȳnadu, rybewitxira erysydumy. ²⁹Ibutumy deòdu aòbo roire? Ibutumy tỹnydỹȳdu aòbo roire? Ibutumy erydỹȳdure aòbo? Ibutumy aòwiwihikỹ widỹȳdure aòbo? Aòkõre wii ihitxihitxire. ³⁰Ibutumy ywisidỹȳ rieryre aòbo? Ibutumy rybe witxira rybedu aòbo? Ibutumy rybewitxira wiuròdỹȳdure aòbo? Aòkõre. ³¹Tahe, eryna wiwihikỹmy mynymy, atximyhỹbenyke. Tahe ariteòsynykre tibo ryy.

13 ¹Ibutumy iny rybe witxira witxira arierykeki, ȳju rybe adierkeki, kia tahe luuna-di aòkòkeki, jiarỹ aòwodỹȳna widỹȳna wesemy ararekre. ²Jiarỹ ibutumy Deuxu rybewahidỹȳ eryna ijòdikeki, ibutumy bedeery ijòdikeki, hāwālò iherina-ribi aritake watyhydỹȳna kiadikeki, tahe luuna-di aòkòkeki, aò aòkò watxireri. ³Ibutumy waaòmydỹȳna iny aòkò mahādu-ò ariwahinykeki. Waumy Kristu Rybewihikỹ dee òraru-ki wòsikemy ariwahinykeki, tahe luuna ijoòkeki, kia heka aòkòweseleke. ⁴Inyò luunadikeki, ywimy rarekre, awimy

rarekre, ihãrukõmy rarekre, luunadikeki, ixityhydÿÿdukõmy rarekre. ⁵Inyõ luunadikeki ihÿkÿhÿkÿmy aõkõ rarekre. Ixisohojidile aõkõ rõhõtinkyre. ⁶Òbitiõna-di deysaõmy, inatyhyle kedeyesakre. ⁷Moõ iluunadireki ibutumy aõhebo rotÿÿnykre, ibutumy rityhynykre, ibutumy riraõkre, ibutumy riðludunykre. ⁸Luuna tiu itueõtyhy, tahe rybe tÿnydÿÿna aõtxumy ituekre, rybewitxiramy rybe ituekre, bede eryna erysynamy tule ituekre. ⁹Inyboho iyrelemy rieryrenyre. Tule iyrelemy ritÿnynyre. ¹⁰Aõtxumy tahe kia iyre rexihukre, ibutumy kanaerykre, kia hãbu òbiti tyhy kedehemynykeu, Kristu wahe. ¹¹Uladumy rarewãhãu uladu wesemy rarybere, uladu wesemy ixidi rarewãhã, uladu wesemy raykywydynanyra. Hãbumy relereu tahe, wauladumy nona rerire. ¹²Wiji tahe inyboho robirenyre, iwese itxerenatÿnykowese-ki, kiadxu tahe, wiðsanamy rokobirenykre. Katahe iny rieryrenyre txuraõ, kiadxu tahe, iwese tii inyboho dierydenyde wese rikieryrenyre. ¹³Tahe inataõ aõmydÿÿna rÿire: ityhydÿÿna, irarõsõna, luuna. Ijõ ratyre tahe luuna rare.

14 ¹Luuna-di boibeke ibutu ijõ ratyre. Tyytybytyhy erysyna bijebenyke. Iratyre bijebenyke Deuxu rybe tÿnydÿÿna erydÿÿna. ²Inyõheka rybe witxiramy rarybekeki, hãbu-ò aõkõ rarybereri. Deuxu-ò sohojile rarybere. Inyõ irybe rieryõre. Deuxu Tyytybytyhy rybe tii erydure. ³Inyõ Deuxu rybemy rarybemyhÿreu, iny-ò rarybereri. Tai riwiðhenanymyhÿre, riòbitinymyhÿre, riteysanymyhÿre. ⁴Inyõ rybe witxiramy rarybereu, tiilehyy rexiwiðhenanymyhÿre. Inyõ tahe rybe ritÿnynyke wana, dohodÿÿna mahãdu riwiðhenanyre. ⁵Ibutumy rybe witxiramy rarybekeki, tii tahe wadee awire. Tahe ibutumy Deuxu Rybewihikÿmy rierynanykeki, kia iratyretyhy wadee awire. Deuxu rybe tÿnydÿÿna tahe, rybe witxiramy rybedu ratyre rare. Wiurõsòdÿÿdudile rybe witxiramy rarybeke dohodÿÿdu mahãdu wiðhedÿÿmy rarekemy. ⁶Jiarÿ adeereny ararybekeki, rybewitxira-di. Tiwesebo arãwiðhenanyrenyke. Urile bede erytÿmyra-di, erynatyhyhyky-di, inatyhyeryna-di araerynanykeki, kia-di tahe arãwiðhenanykre. ⁷Ka tahe wiudÿÿna rare. Wyhyhykÿ jurõnawesena ada rerotisõmo wiudÿÿna kidiwiunykeki, tahe awimy riwiunyõke, timykibo iny rieryke aõbo riwiunyereri. ⁸Tule jurõna òbitimy ritxurõnyõkeki, timykibo aõbinadu mahãdu rierykre aõbina-ò nomy rexiywinykemy. ⁹Kaiboho tule kiawesere. Inyõ arybe rieryõkeki, tiwesebo rieryke aõmybo tarybetenyteri. Kiawese dori yhydeele tarybetenyteri wese. ¹⁰Inatyhymy sõwemy rybe witxira rÿire bede-ki, ibutumy tahe aõna aõnamy rybedu rarybere. ¹¹Aõmybo rarybere arierykõkeki, rybedu dee jiarÿ iny witxira, rybewitxiraõ tamy rare, tule tii wadee rare. ¹²Kaiboho Deuxu Tyytybytyhy eryna teijetenyereri. Tai dohodÿÿna mahãdu wiðhedÿÿmy marurunybenyke. ¹³Inyõ rybe witxiramy rarybekeki, iòbitidÿÿnamy rexitõenyke. ¹⁴Rybe witxiramy arexitõenykeki, watytybyle rexitõenynereri waraykywydyna-ò ralõõtyhy. ¹⁵Tai tahe aõhebo arotÿÿnykre? Watytyby-di, warayky-di arexitõenykre. Idi watytyby-di warayky-di arawiunykre. ¹⁶Kai atytybyle-di textitõenymyhÿteu, timykibo inyõ rierykemy? Idi rarybeke aixitõedÿÿna rexihukeu. Tii dori arybe rieryõre. ¹⁷Kai tahe inatyhymy awimy textitõenye, tai

tahe iny aõ rieryõhyyre, idi riwiòhenanyõtyhy. ¹⁸Deuxumy reàlàwãhãre. Jiarỹ dori aratyrereny rybe witxiramy rarybemahãre. ¹⁹Tahe dohodỹỹna mahãdu-ò iruyre rybe eremy ierysynamy ararybeke ada sõwemy rybe eremy iwitxira rybemy anarybekeki. Juhule wadee awityhyre ijõ ratyre-ki iny kiawese inatyhymy reerynanyre.

²⁰Waityhydỹỹdu seriòre uladu raykywesemy aõkõ bexiraykynymyhỹbenyke. Inyery bedeeryhykỹ wese maraykynybenyke. Aõibina erysynale uladu aõeryõ wesemy boibeke. ²¹Bede Ywina tyriti-ki kia rỹire: —Kia inydee, hãbu rybe witxira-di anarybekre. Ihãre ta warybe dee tiiboho roholarenỹòkre. —Kiamy tahe Wanyrỹ rarybere. ²²Inatyhymy tahe iwitxira rybe rybemy ityhydỹỹdu mahãdu dee deòsina aõkõ rare. Kia ityhydỹỹdukõdu mahãdu dee deòsina rare. Tule Deuxu rybe tỹnydỹỹna ityhydỹỹdu mahãdu-ò rare. ²³Dohodỹỹna mahãdu wii ributunykeu, rybewitxiramy rarybemyhỹreki. Ityhydỹỹdukõdu mahãdu ralòkeki, iny ierykõdu ralòkeki, timybo tii røhõtinyke.@ taitxýtetenyterilemy idi røhõtinyke. ²⁴Tahe ixityre ityhydỹỹdukõdu mahãdu ralòkeki, tahe Deuxu rybemy rarybereriò, ralòkeu, tii rexierykre òrarudumy rare, ibutumy aõwòmymy roholare tarayky riixixanyke. ²⁵Aõbo tawo-ki riwòmymy rỹimyhỹredi rexierymy ixi-di røhõtinykre. Tai resekre tatiowomy Deuxu deàlànamy reàlàkremy. Tule rarybekre: —Inatyhymy Deuxu ayreny-ki ratxireri.

²⁶Aõhebo dohodỹỹna-ki rokotỹỹnyrenykre waseriòreboho wii rikibutunyrenykreu. Kia heka rare: Inyõ wiuòmymy kanawiunykre, ijõ tasỹ Deuxu rybe bede erydỹỹna kedeerynanykre, ijõ itỹnydỹỹnamy kanarybekre, ijõ rybewitxiramy rybena kanarybekre, ijõ iwiuròsòdỹỹnamy kanarybekre. Aõhebo botỹỹnybenyke ityhydỹỹdu wiòhedỹỹnamy rarekemy. ²⁷Inyõ rybewitxiramy rybemy ratxire riki, inatxi inataõlemy rarybeke, wihewomy, tule iwiuròsòdỹỹdulemy rarybekre. ²⁸Wiuròsòna ihoòkeki, rybeõlemy ronyke dohodỹỹna heto-ki. Ixiwanale Deuxu-di røhõtinyre, rexitðenymy. ²⁹Urile inatxi, inataõlemy rybe tỹnydỹỹdumy rarybekre wana, ijohonadu mahãdu tahe irybe-di røhõtinytyhyke timybo. ³⁰Ijohonadu-ò itỹnydỹỹna rybemy ratxikeki, rybedu rexihudi rarybekre. ³¹Ibutu dori Deuxu rybemy rarybekre, sohoji sohojimy. Tai ibutumy rierykre, reysakre. ³²Rybe tỹnydỹỹdu mahãdu rayky, tiile rexierymyhỹkre. ³³Deuxu tahe wimymy uriuridỹỹdu aõkõ rare; tii tahe õbitina widỹỹdu rare. Ibutu ijõ dohodỹỹna heto-ki kia wesemy rare.

³⁴Hãwyy tahe dohodỹỹna-ki roholamy rỹimyhỹre rybeõhykymy tai aõwedumy aõkõ. Ywilemy rỹirake iwese judeu bedewidỹỹna roimyhỹre wese. ³⁵Tỹỹraxinadikeki taheto-ki tahãbu-ò rỹỹraxike. Hãwyy dohodỹỹna-ki rarybemyhỹre heka ixỹruna rare. ³⁶Timywese tahõtinytenyete. Deuxu rybe aõbo aykyreny-ki røhònnyre ada kaiboho sohojile aõbo ijõdire.

³⁷Inyõ rybe tỹnydỹỹdumy ixi-di røhõtinykeki ada Deuxu Tyytybytyhy-ò wiòhedỹỹnamy rarekeki. Timybo rarybekre. Kia waryberiti heka Deuxu bede ywidỹỹna rierykre. ³⁸Inyõ kia rityhynyòkeki, tii wile ratyhyõdỹỹòkre.

³⁹Iribi tahe waseriòre t̃nyd̃ỹd̃umy boibekemy atxibenyke. Ixinamy rybewitxiramy iny rarybemyh̃yke. ⁴⁰Ibutumy aõhebo bot̃ỹnybenykre. Òbitilemy, ywilemy.

15 ¹Aõtxi òhõtireny araijarad̃ỹnykre. Kia tahe rare. Rybewihik̃ iwese adeeremy ret̃ynnyre wese, tetyhynnyte wese, tule tetyhynnyhy ahãtenyete. ²Tai tahe tarasanawo-ki ahãtenyete rybe teeryhyh̃y ahãtenyete ki iwese ret̃nyd̃ỹnyre wese. Aõkõkeki arõtenareny aõtyhy aõkõ adeeremy ih̃yre. ³Juhuutyhy adeeremy ret̃ynnyre iwese raholare wesemy. Kia rare: Kristu iny òrarureny dee rurure. Kiamy heka ritid̃ỹna roire. ⁴Tule mana wabede-ò rahãluure. Inataõ txu idi r̃yidi tahe, rubu-ribi rexixare, ritid̃ỹna rarybere wese. ⁵Rexided̃sinyre Pedro dee, idi tahe waðinatxi mahãdu dee. ⁶Idi tahe 500 iny ratyre tuu robire. Kia iny ityhyd̃ỹdu seriòre mahãdu ibutumy rexibutunymy h̃yre Jesusimy robire. Ijõ rurure kia butud̃ỹnay-ribi, tahe ijõ irulemy ih̃ymy h̃yre. ⁷Iribi tahe Txiau tuu robire, idi tahe ierydu mahãdu ibutumy tuu robire. ⁸Ihewo-ribi tahe jiar̃y tuu rabire. Iwese uladu ibeded̃ỹnanakõmy reare wese tuu rabire. ⁹⁻¹¹Jiar̃y ierydu hewo ludu rare. Uritere erydumy wanid̃ỹõmy watxiwãhãre, raix̃yrure wahe. Jiar̃y dori juhuhu ityhyd̃ỹdu mahãdu aõhõk̃ymy d̃ỹdu rare. Deuxu ruxetdenale dori aõmy watxiwãhãre. Iruxetdena aõnihik̃my waki riwinyre. Jiar̃y dori ibuturatyre aõmys̃d̃ỹna rewinyre. Tahe jiar̃y aõkõ wãhãre. Deuxu ruxetdenamy wahãre jiar̃y aõbo ada tiiboho aõbo adeeremy relyyreny, idi kaiboho tetyhynnyte.

¹²Kristu rubumy roira-ribi rexixara, kiamy heka rarybemahãreny. Aõherekibo inyõ rarybereri rurumy h̃yre-ribi inyõ rexixaõkremy. ¹³Inyõ tiu rubu-ribi rexixaõkeki, Kristu tahe rexixaõre tarubu-ribi. ¹⁴Kristu rubu-ribi rexixaõre wana, jiar̃yboho aõmy waryberenyõna idi aõ atyhyd̃ỹnaõna. ¹⁵Kristu inatyhymy rexixaõkeki, inyboho Deuxumy ruimy rybedu mahãdumy roire. Kristu ixixana rybemy dori jiar̃yboho rarybemy h̃yreny. Kiata bohe Deuxu, Kristu riixixanyõlere. ¹⁶Rubumy roimyh̃yre mahãdu rexixaõkeki, taita Kristu rexixaõre. ¹⁷Kristu rexixaõkeki, ainatyhynareny aõ aõkõ rare. Aõrarudile ahãtenyete. ¹⁸Tule, ityhyd̃ỹ-di rurure mahãdu, biu-ò ròiõtyhy. ¹⁹Kabede-ki sohojile inyboho Kristu riraõmy h̃yreki, inyboho bedewotyhytyhymy roire.

²⁰Inatyhymy taheka Kristu rubumy roire-ribi rexixare. Tii juhuuludu rubu bede-ribi dõsede mahãdumy roirekemy, tai iny tule rerexixarenkyre. ²¹Iwese hãbu sohojiõ rubu diwyde wese, tule hãbu sohojiõ rubu-ribi ixixana diwyde. ²²Iwese Adaõ-ki ibutumy iny rurukemy r̃ymyh̃kemy tule Kristu-ki ibutumy ixixana kiditakre. ²³Kristu beded̃ỹnana kedehemy h̃kreu, rubu-ribi ixixana kidiixixanykre. Kristu juhuhu rexixare, ihewomy tahe taeryna mahãdu kidiixixanykre. ²⁴Tai tahe bede konanakre. Jesuisi ibutu wedu mahãdu, bede dinodu mahãdu, Iòlò mahãdu kanahukre. Tahe ibutumy tyby Deuxu-ò òlõna kidiõkre. ²⁵Jesuisi tahe ibutu ratyre Iòlõmy ratxikemy rarehykyre. Iòludu

mahādu ibutumy iwarawo-ki r̄yikre. ²⁶Iòludu konana heka, rubu rare. Tii tule riixāwidid̄ȳnykre. ²⁷Ryberiti kiawese roire: —Deuxu tahe ibutumy iwarawo-ki ritidireri. Iximy ritidiōtyhy tii dori tidisidu rare. ²⁸Rexihudi tahe tule iRiðre ritidikre. Tai tahe Deuxu ibutu iðlòm̄y rarekre.

²⁹Rubumy r̄yira ixyby kedexixaōkeki aōherekibo iny deròwy teratisebenyteri, rubumy roira mahādu hārehek̄yle wahe. ³⁰Aōherekibo berebunatyhyhyk̄y-txi inyboho iðhārumy ratximahārenȳre txuō txuōlemy. ³¹Ibututxu rubu rejjemyh̄ȳre. Adeereny wawowydynatyhymy watzireri. Jesuisi Kristu Inynyr̄y òraru-ki. Tai heka kia lau rarybemahāre. ³²Hābu mahādu-ò Efesu hāwā-ki iròdu debure-ò aōbina wese resumahāreki aōtyhybo aritakre? Inatyhymy aōbo? Rubu rexixaōkeki, rikiroxiryrenyke, rikiōrenyke, biurasòm̄y dori rukururenkyke. Aō aōk̄o inytyhyd̄ȳna. Kia riki ityhyd̄ȳdukōdu mahādu tuu rexirybenȳre, abiðwa mahādukeki. ³³Ixi itxenad̄ȳōmy: kia biðwa bina dori iny ixihemy riatymyh̄ȳre. ³⁴Ywityhylemy boibeke, òbitilemy òrarenyōmy, sōwemy iny Deuxu rieryōre. Kia heka iny ix̄ȳrud̄ȳnareny rare, tai rarybewāhāre.

³⁵Tahe inyō kanarybemyh̄ȳkre: —Timybo rubu kedexixakre. Aōumywesemykre iumy? ³⁶—Itx̄ȳte, juhuu alòboròna rabròōkeki tiu txuhuōna. ³⁷Telòho iny ribòrònyōtyhy, ityle iny ribòrònyke. Iwese maixòm̄y ribòrònyke ada oworuty wese. ³⁸Ibututy-ò Deuxu iraty umy riwahinymyh̄ȳre ixideewireki. Deuxu ixideewimy alòbòròna ritxuhud̄ȳnymyh̄ȳre timybo? ³⁹Dee ibutumy wiwese wese aōk̄o rare. Inyde, iròdude, nawiide, uturade ibutumy tahe wiribi hitxi hitxire. ⁴⁰Biumy r̄yira mahādu tule lahixire, aōwitxira witxira bedemy r̄yira kia wowodynareny wiribi hitxire. Tii-wana wimy rahitxirananyre. ⁴¹Txuu ahādu, taina, iloosònareny wiribi hitxire. Taina ij̄o taina-ribi iruxeratyhyre. ⁴²Tai tahe kia wese rubu-ribi ixixana r̄ymyh̄ȳre. Umy rubu su-ò rahālood̄ȳmyh̄ȳre rarònyhe txu. Idi tahe irulemy kòdòhònykre, alòbòròna ruhunymyh̄ȳre wese tahe umy tuedeōnaō. Bede luruhuk̄y-ki rahālood̄ȳmyh̄ȳre, tahe loosònatyhy-ki kòdòhònykre. ⁴³Iruruō-di umy heka rahālood̄ȳnymyh̄ȳre ibinare, tahe iruxeramy tarurutyhy-di kòdòhònykre. ⁴⁴Iny umy wesemy rahālood̄ȳmyh̄ȳre, tahe tyytyby wese kia umy-di kòdòhònykre, biuludu mahādu wahe. ⁴⁵Kiamy heka ritid̄ȳna-ki roire. Iny umy riuhemyh̄ȳreki, tule tyytyby umy riuhemyh̄ȳremy r̄yire: Juhuu inyiru Deuxu riwinyre Adaō heka rare. ⁴⁶Juhu tahe inyumyreny tayry-di riwinyre idi tahe ritytybynyre. ⁴⁷Juhuu ludu hābu suribi ije rare. Ihewo-ribi Hābu biu-ribi ih̄ȳre Kristu wahe. ⁴⁸Juhuu hābuwesemy ibutumy iny bede ludu ih̄ȳre juhuu inytyhy wese wahe. Hābu biuludu wesemy ibutumy biu ludu mahādu ih̄ȳre. ⁴⁹Tai tahe kabede hābu wesemy inyboho r̄ymyh̄ȳrenȳre wesereki, tule biu ludu Hābu wesemy r̄yk̄ȳrenyke.

⁵⁰Waityhyd̄ȳdu Kia heka rarybemahāhyreri, iwese inyboho ih̄ymyh̄ȳrenȳre wesemy tiu Deuxu Òlòna-ò ralòòtyhy. Iny umy heka ruruhyy umy rare, tai tahe Deuxu Òlòna ritaōtyhy, kowa-ò dori iny umy ruruōtyhy. ⁵¹⁻⁵²Tahe aōbo teeryòte adee arit̄ynynkyke: Ibutumy iny ruruōkre. Ibutumy ityhyd̄ȳdu iny ruruòle iumy riwitxirat̄myranykre, aōwesele reakre, iny tarue riberenymyh̄ȳre

wese reakre, ikonana juròna ritxurònykreu. Juròna ritxurònykre idi ibutumy ityhydÿÿdu rubumy rÿira riumywitziratÿmyranykre umytuedeõna-di. Inyboho ityhydÿÿdu mahãdu tulekre. ⁵³ Tahe rekexiwiurònyrenyke, iny bede umy dori rurumyhyre. Rakaumynykre umy wixira-di taita rukururenÿoÿtyhy. ⁵⁴ Iny umy wixiradikre, tahe kia rybe rexihumy rÿikre: Ryberitina rarybere: —Rubu ijesu rikitarenykre: ⁵⁵ —Aõherekibo rubu, aijesuna wawana tetaõta? Aõherekibo tiwamytxitxidÿÿnyõte? ⁵⁶ Òraru rubumytxitxidÿÿdu rare. Bedeywidÿÿ òraru rurudÿÿna rare. ⁵⁷ Deuxu umymy rekealàmhyÿkre, tii dori ijesu inybohoreny ritakemy riwiòhenanymyhyre. Jesuisi Kristu Inynryÿ-di diwiòhenanymyhyde. ⁵⁸ Tahe weseriòre luu mahãdu, bityhynhybenyke, ywihyymy ahãbenyke, Wanyrÿ aõmysÿdÿÿna-ò hyy tiemy ahãbenyke. Aaõmysÿdÿÿna Wanyrÿ dee, idi inydee awimy rarootinymyhyre.

16 ¹ Nierumy ararybekre. Kia bibutunykemy kowa tyhydÿÿdu mahãdu-ò, Judeia mahãdu wahe. Iwese Alaxia mahãdu-ò ròerynanyre wese, kaiboho tule ijõ dee bitabenyke. ² Semana juhu ludu txuu, iny sohoji sohoji tiwesebo tótatenyte jura birarenymahãbenyke rawahikremy. ³ Tai adehemynykreu kia nieru rexihumy rÿikre myiõtyhy tahe ijõ rarasamy. Tahe mobo kai tyriti-di biditakre, tii-wana nieru iny ariteònykre Jerusalẽ-ò. ⁴ Tahe jiarÿ arakewana iny dee wikeki, tuu wawana kodoikre. ⁵ Macedonia bede-ò arakre rahudi arehemynykremy adeereny watzireri. Macedonia-di delemy arakre. ⁶ Araroorehenykre õsana biubede taile arahukre awanarenhyhye. Tai ele elemy biwatÿidÿÿnykre titxibo arakemy. ⁷ Deuxudeewikeki urihimyò aõkõ akireny bede arieke bededÿÿnana arahukre akireny. ⁸ Efesu hãwã-ki Pentecoste woranabedehesi konana-ò ariijekre. Idi tahe arakre. ⁹ Ijõtòbònahakÿ wese irayhyky rÿimyhÿre waaõmysÿdÿÿ. Tai waaõmysÿdÿÿna irutaõre, ihãre ta wamy òludu sówere. Namy sówehyymy taheka òludu rÿire.

¹⁰ Tahe, Tximõtxi rakeki, iixÿru lau bijemy tii dori Deuxu aõmysÿdÿÿna diwinymyhyde wawese. ¹¹ Inyõ Tximõtxi-di aõmy aõkõ ihÿkeki heka wadee awiõre. Wadee itÿina-ò biwiòhenanybenyke ywina-di. Reraõmahãre dori ityhydÿÿdu seriòreboho wana kanakemy. ¹² Inyseriòre Apòlo-ò sówemy rarybewãhãre arorarenymy rakemy ijõ iny seriòreboho-wana. Tahe tii heka Deuxudeewimy aõkõ idi röhòtinymyhyre. Idi tahe rakre ixideewimy tiu txumybo.

¹³ Aõu aõu bexiywinylemy borukubeke. Inatyhymy õbitimy myibenyke, hãbu rurutere wesemy bexirurudÿÿnyke. ¹⁴ Aõhebo botÿÿnybenykemy ywina-di luuna-di botÿÿnymy boibemahãke.

¹⁵ Tefana, tasÿ mahãdu-wana Akaia bede ludu-ki ityhydÿÿdumy juhuru rare. Kia teerytenyte. Tiiboho ityhydÿÿdu mahãdu wiòhedÿÿduhyymy ihÿrenyke. ¹⁶ Tamy boholabenyke, ibutumy tamy wityhymy biwinybenyke. Tule kia wese wiòhedÿÿdu biwiòhenanybenyke. ¹⁷ Tefana, Fortunatu, Akaio kaò ditehemynydenyde. Taita wadeysamy watzireri. Tiiboho riwawiòhenanyrenyke kaiboho kaki aõkõ atximahãtenyteki. ¹⁸ Tiiboho wawo-ribi riwateysadÿÿnyre, arakyreny õsÿny tule wahe. Kia mahãdu heka ratyhydÿÿmyhyÿke.

¹⁹Kaki Asia bede-ki ibutumy dohodỹña mahãdu tarybe wehityhyna adeereny riwahinyreri. Akila, Prisila-wana taluuna Wanyrỹnimy rybe adee riwahinyrenyreri taheto-ki dohodỹñnareny mahãdu tule wahe. ²⁰Ibutu seriòre mahãdu rybe wehityhyna adeereny riwahinyreri. Birybenybenykreu wii bimybennykre wiwetya-ki seriòrewesemy tamy luòsòna òbitityhyna-di buòbenykre.

²¹Iroo tahe jiarỹ ariritinykre wadebò-di wahe. Jiarỹ Paulo warybe wehityhyna rewahinyre. ²²Inyõ Inynyrỹ luuõkeki, aõbinahakỹbo tamy kanake, kiamy rexirybenyre: ‘Maranata’ kia heka Jesuisi wymy kanake rare. ²³Deuxu luuna adeereny kanakemy idi watxiwãhãre. ²⁴Ibutu-ò waluuna Jesuisi Kristumy. Kie.